

Date – 04/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- Chakma Autonomous District Council ah BJP sorkar a piang taa, vawiin khan Chief Executive Member atan Pu Molin Kumar Chakma lakluh a ni.
- Nikum chhung khan Zemabawk Cancer Hospital-ah Cancer natna vei inziaklut thar mi 2000 an chuang.
- Union Agriculture Minister Shivraj Singh Chouhan chuan agriculture sector-ah eirukna leh hlemhletnaah inhnahnawihte chungah na taka hremna pek a ni ang a ti.
- Member 70 awmna Delhi Assembly inthlanna naktuka nei turin inbuatsaihna peihfel a ni tawh.



CADC

Chakma Autonomous District Council ah BJP sorkar a piang taa, vawiin khan Chief Executive Member atan Pu Molin Kumar Chakma lakluh a ni.

Lalluh inkhawm hi Chawngte ah neih a ni a, Lawngtlai Additional DC Pu Zoramsiama Hmar chuan rinawmna thu tiamtirin a lalut a ni.

CEM thar Pu Molin Chakma chuan Chakma Autonomous District Council ah BJP sorkar a piangta chu lawmawm a tih thu a sawi a, Political Party hrang hrang, Tlawmngai pawl leh ram leh hnam veitute chu Sorkar tawiawm tura sawmin, thawhhona thatak hnuaiyah inrelbawlina leh hmasawmna awmzenei zawk Chakma mipui ten an neih ngei a beisei thu a sawi.

Chief Executive Member thar chuan a thawhpui tur Executive Member atan mi panga, Kalasoga Chakma, Supan Chakma, Montu Chakma, Amit Bayan Chakma leh Ananta Bikash Chakma te a ruat tih a puang.

CEM lakluhna ah hian Pu Rasik Mohan Chakma, MLA, Pu K. Hrahmo, MLA, Pu M. Laikaw, Chief Executive Member, MADC; Pu. N. Viakhu, Chairman, MADC bakah hruaitu pawimawh tak tak te pawh an tel a ni.

(Lalnggheta Ralte Lawngtlai PTC)



TUIVAI BRIDGE

Chief Minister Pu Lalduhoman Mizoram leh Manipur inkal pawhna Tuivai lei dawh zawh ani chu lawmawm atih thu a sawi.

Chief Minister chuan Instagram account kaltlangin he thu hi a sawi a, sawrkarna an chan hnua Manipur lam unau harsatna tawh mek ten mamawh an thlen hmasak ber chu Tuivai lei dawh ani tih sawiin a hmunah a tlawh a, feet 200 a thui Bailey Bridge dawh turin hma an la nghal tih a sawi.

Thudawn danin Tuivai lei hi Chief Minister Pu Lalduhoma'n February ni 17-a a hawn turin ruahman a ni a, Nikum March ni 13 atanga dawh tan Tuivai lei hi dawh zawh tawh niin enchhin tawh a ni a, Lei hi a rinawm tawh em tih enchhinna atan hian Truck lian (Hyva) hman a ni a. Lei hi Ton 20 ai a rit zawhpui loh tur a ni a, PWD Department chuan hei hi zawm vek turin mipui an ngen a, ZPM Thalai chuan wawiin khan thuchhuah siamin Tuivai lei dawh zawh theih nana Sawrkar hmalakna ah an lawm thu an sawi bawk.

Tuivai lei Bailey Bridge hi Feet 200 a sei niin Mizoram a Bailey Bridge sei ber a ni a, Tuivai lei hi dawh zawh ni tawh mahse mipui hman theih a hawn a la ni lo a. Mizoram leh Manipur lam, lei bul thut kawng hi siam that a la ni lo a, Manipur lam chu tunah hian siam mek a ni. Mizoram lam hi kar leh lamah hna tan tum a ni. Hei bakah hian Chief Minister-in a hawn hma chu PWD lam hian zawh an la remti tih lo a ni.



CANCER

Nikum chhung khan Zemabawk Cancer Hospital ah Cancer natna vei inziaklut thar mi 2000 an chuang.

Vawiin a khawvel puma Cancer dona Ni- World Cancer Day 2025 hmanna ah tarlan a ni a. National Health Mission hnuaia Programme, National Programme for Prevention & Control of Cancer, Diabetes, Cardiovascular Diseases & Stroke (NPCDCS) chuan he hun hi hmangin, MINECO-ah Health & Family Welfare Dept Principal Director Dr.Vanlalsawman a hmanpui a ni.

Mizoram State Cancer Institute-in a tarlan danin kum 2023 chhung khan Cancer Hospital Zemabawk ah Cancer natna vei in register mipa leh hmeichhe belh khawm hi 2000 chuang an awm a, cancer natna vei mipa in register zingah Chawkawng cancer tam ber in, Pumpui leh Chuap cancer natna vei an tam hle bawk a. Hmeichhe cancer vei in register zingah Hnute cancer chu tam ber in, Chhul hmawr leh Chuap cancer an tam hle bawk.

MSCI Director Dr.Jeremy L.Pautu chuan bul tan tirh laite ngaihtuah chuan nasa takin Mizoram pawhin cancer enkawl kawngah hma a sawn nasa hle tawh a ti a, cancer case thar hi a ni tela a pun chhoh zel avangin MSCI pawh thuam changtlun chhoh mek zel a ni a ti. Japan international Cooperation Agency (JICA) te nen cheng vbc 732 Crore senga MSCI pawh thuam a nih thute tarlangin hei hian nakinah nasa takin Cancer enkawlna leh research neih kawngah min pui hle dawn niin a tarlang tel bawk.

He hun hmanpuitu Dr. Vanlalsawma chuan, Cancer hian mihring a khawih dan hi a inang lo a. Hei tak hi a enkawltu leh damlo chenpui te hian an hriat thiam a tul thin a. Cancer damlote hi mi bik an ni a, hriatthiamna thuk tak nen duat taka

enkawl a tul a. Hemi kawngah hian thawktute pawh nasa leh zual tan la turin an inngen a ni” a ti.



KAWLKULH GROUP YMA

Khawzawl District a Kawlkulh Group YMA chuan thuchhuah siamin an Group huamchhung Kawlkulh leh Hliappui inkar leh Kawlkulh leh Dulte inkar kawngah te Kuhva rah phur tlan an phal loh thu an sawi.

Kawlkulh Group YMA thuchhuaha tarlan anih danin, Inrinni kalta khan Kawlkulh Group YMA Executive Meeting neiin Kawlkulh leh a chhehvel kawng te Kuhva phurtu ten an hman thin thu an sawi a, tunlai hian Kuhva rah phur motor lian leh te an tlan thin tih hriat anih thu an sawi a ni.

Kan corr report lo ngaithla ang.

VC

Kawlkulh Group YMA chuan Kawlkulh leh Hliappui inkar, Balaji Pvt Limited ten PMGSY III hnuaia an thawh mek chu kawng laih hna zawh fel thawkhat a ni tawh a, hun reilo te-ah kawng chhuat phah a ni tawh dawn ni a hriat a nih avangin vantlang mipuite tana siam leh tangkai taka an hman mek chu dan phal loh thil phur te avanga chhiat mai an duh loh thu an sawi a.

Hei bakah hian Kawlkulh -Puilo kawng, SASCI hnuaia siam zawh thar te, Kawlkulh Dulte inkar bypass avanga One Time Improvement tih hmabak mek te chu Kuhva rah phur motor ten an zawh chuan reilote-ah a chhe leh vat thei dawn niin an hria an ti a, hei vang hian Kuhva rah phur Motor te Kawlkulh Group YMA huamchhungah tlan an phal tawh lova. Ngenna thuchhuah pawisa lova tlan lui an awm a nih chuan District thuneitute nena inbiakremna angin hma lak a ni dawn tih an tarlang a ni.

(Lalsangpuii Akashvani News Khawzawl)



SEC- MODEL CODE OF CONDUCT

PWD Minister Pu Vanlalhlana’n Election Model Code of Conduct bawhchhiaa an puhna chungchangah State Election Commission ah ngaihdam a dil a, EMCC bawhchhiat loh a intiam bakah video upload pawh delete tura hriattir a ni a, hemi atana a hmalakna hi ni 3 chhungin SEC ah thehlut tura hriattir a ni bawk.

SEC thuchhuah tarlan danin MNF General Headquarters-in Complaint a thehluh avangin PWD Minister Pu Vanlalhlana chu insawifiah tura hriattir a ni a, Pu Vanlalhlana chuan Model Code of Conduct (MCC) bawhchhe tura a tum reng vanga video clip chu siam anih loh thu leh, dan bawhchhiatna a ni tih hre lova, tihpalh a nih thu sawiin, ngaihdam a dil a, State Election Commission chuan thil awm dan hrang hrang chhuia a enfiah hnuaah Minister-in a thil tih pha lova ngaihdam a dilna chu a vawikhat tihna anih avang leh ti tawh lo tura a intiam avangin pawmsakin a ngaidam a, Hei bakah hian Video Clip chu campaign naa ngaih theih anih avangin delete nghal turin a hriattir a. Hemi atana a hmalakna hi ni 3 chhunga State Election Commission-a theh lut leh tura hriattir a ni bawk.

Hetihlai hian MNF Party in complaint an thehluh tho Minister Pu Lalnghinglova Hmar chuan a insawifiah na ah Party mite hmaah Sawrkar hmalakna awm tawh sa leh hma lakna kal mek chungchang a hrilhfiah mai niin a sawi a, MCC chu party tinin tanhmun inang neia inthlan an hmachhawn theih nana siam a nih avangin a zahawm a, MCC in inkaihhruaina hrang hrang a siamte chu tha taka zawm

chhonzawm zel a tum thu sawiin SEC chuan a sawi ang ngeia fimkhur taka inthlan kaihhruaina zawm chhonzawm turin a hriattir a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



KOLASIB

Kolasib DC Pu Robert C. Lalhmangaiha chuan National Highway 306 & 06 thawm that hna kal mekah hna tan mai theihlohna chhan hrang hrang te tihfel a nih tawh avangin hna tan thuai beisei a ni a ti.

Vawiin khan Kolasib DC Conference Hall ah kawng chungchangah meeting neiin Kolasib DC chuan, kawng siam chhung hun a duh rei dawn avangin tun a an kawng hman mek, Mizoram chak lakluhna ber chu thawmthat a pawimawh hle a ni, a ti a. An hma lawkah ruahtui a lo tla leh dawn tih sawiin, chumi hma a hna chak taka an thawh angai a ni, a ti a ni.

Kan corr report lo ngaithla ang.

Meetingah hian NHIDCL hnuaia Contractor ten an hnathawh dan tlangpui report an pe a. BR Goyal Construction company chuan Mualkhang leh Khamrang inkarah km 4 black topping an zo tawh tih sawiin, maintenance hna hi kalpui chhonzawm zel anih thu an sawi a. He an kawng siamna ah hian Committee ngenna angin Silchar leh rampawn lam lung chang tha hman a nih thu an sawi a ni. Balaji Constructions Company pawh in Vairengte leh Bilkhawthlir inkar Black topping chu an tan tawh tih sawiin, Vairengte -Bilkhawthlir leh Kolasib -Kawnpui inkar thawmthat hna chu kumin March ni 31 hma a an zawh theih an in beisei thu an sawi. Mizoram PWD aiawhin Pu R Lalduhthlanga, Senior EE pawh in report pe in Bilkhawthlir leh Kolasib inkar pothole leh khuar dangte hnawh mam hna chu an kalpui mek thu a sawi a. Chutiang bawkin Kawnpui leh Khamrang inkar pawh kalpui a ni, a ti a. Tuihawk luankawr leh pothole dang thenkhat siam na tur pawh estimate theh luh a ni a, hotute thu ngaihchan mek a ni, a ti bawk.

He hunah hian NGO leh JAC aiawh a lokal te pawhin thu sawiin, kawng tha neih thuai a nih theih nan sawrkar chu thawhpui zawm zel an inhuam thu an sawi a. Hemi denchan hian kawng endik hna, monitoring an kalpui thin pawh chhonzawm nise tia rel a ni.

(Andrew Vanlalauva Akashvani News Kolasib)



UNION AGRICULTURE MINISTER

Union Agriculture Minister Shivraj Singh Chouhan chuan agriculture sector-ah eirukna leh hlemhletnaah inhnahnawihte chungah na taka hremna pek a ni ang a ti. Pu Chouhan-a chuan Lok Sabha-a Question Hour ah he thu hi sawiin an sawrkar chuan agriculture lamah eirukna chi reng reng an ngaizam mai mai dawn lo a ti. Pu Chouhan-a hian NCP (SP) hruaitu Supriya Sule'n Maharashtra agriculture Department-a cheng vaibelchhe 5000 chuang tih chingpen chungchang a zawhna a chhannaah he thu hi a sawi a. Uluk taka chhui anih tur thu sawiin mawhphurtute chu na takin an hrem dawn tih a sawi a. Union Agriculture Minister chuan Prime Minister Narendra Modia sawrkar chuan loneitute sum lakluh tihpun chu an tum ber anih thu a sawi lang bawk a ni.



PM INTERNSHIP SCHEME

Pradhan Mantri Internship Scheme hnuaiyah sawrkar laipui chuan sawmna nuai 1 sing 2 leh sang sarh chuang a dawng tawh a ti. Vawiin Rajya Sabha-ah zawh belhna chhangin Union Minister of Corporate Affairs Nirmala Sitharaman-i chuan sawrkarin thalai thalai intern ti duhte chu ramchhung district 743 ah a dah tawh a ti a. He scheme hi kalpui anih atangin an thawhpui company tam takin internship tihna tur hi nuai 1 sing 2 leh sang 7 chuang an chhawpsak tawh a , heng zingah hian sing 2 leh sang 8 chuangin pawmin internship hi an ti mek a ti a. Kumin January thlengin company 80 in internship ti duh tan sawmna an siam tawh a ti bawk.



DELHI ELECTION

Member 70 awmna Delhi Assembly inthlanna naktuka nei turin inbuatsaihna peihfel a ni tawh. Zing dar 7 atanga tlai dar 6 thleng vote thlak a ni dawn a. Delhi Assembly ah hian vote nei vaibelchhe 1 leh nuai 56 chuang an awm a. Tun tum inthlan hi kil thum atanga inchuh niin BJP, AAP leh Congress Party ten inthlan hi an chuh a. Candidate 699 an awm a ni. Vote tla te hi Inrinniah chhiar tur a ni.

